

MLJEKARSTVO

MJESEČNIK UDRUŽENJA MLJEKARSKIH PODUZEĆA HRVATSKE

GOD. III.

ZAGREB, SLJEČANJ 1953.

BROJ 1

»MLJEKARSTVO« NA POČETKU TREĆE GODINE

U trećoj smo godini, što izlazi list »MLJEKARSTVO«. Uredništvo lista postavilo si je zadatak, da list što više proširi i da nađe što veći broj suradnika ne samo među mljekarskim stručnjacima, već i među svima onima, koji mogu pridonijeti povećanju i poboljšanju mljekarske proizvodnje. Međutim uredništvo dosad nije naišlo na onaj odziv, koji je očekivalo.

Mljekarski list je potreban svakom mljekarskom stručnjaku, radniku u mljekarskom pogonu i proizvođaču mlijeka, jer će u njemu naći potrebne informacije o aktuelnim problemima, a svojom će suradnjom pomoći rješavati te probleme.

Nadamo se, da će naši pretplatnici i ostali čitatelji u god. 1953. u tome potpomoći nastojanje uredništva lista i da će svaki u svom krugu poraditi, kako bi se proširio naš list i stekao što više suradnika. Time će olakšati izlaženje lista, poboljšati njegov kvalitet i ujedno pridonijeti unapređenju našeg mljekarstva.

Pretplatnici i suradnici lista, o vama zavisi, kakav će biti list u god. 1953., i zato nastojte, da svojom suradnjom, redovitom uplatom pretplate i širenjem lista potpomognete uredništvo lista!

Ovim putem dosadanjim svojim suradnicima, pretplatnicima, čitaocima lista i svima onima, koji su pomogli širenju lista, želi

UREDNIŠTVO »MLJEKARSTVA«

SRETNU NOVU GODINU 1953!

Rukavina Lujo — Beograd

FORMIRAN JE INSTITUT ZA MLEKARSTVO FNR JUGOSLAVIJE

Na predlog Saveta za narodno zdravlje i socijalnu politiku Vlade FNRJ (»Službeni list broj 58/52) 28. novembra 1952. godine Vlada FNR Jugoslavije donela je rešenje o osnivanju Instituta za mlekarstvo, sa zadatkom da radi na unapređenju mlekarstva. Institut je predračunska ustanova sa samostalnim finansiranjem sa sedištem u Beogradu.

Što je uslovlilo osnivanje instituta

U mnogim zemljama u svetu pridaje se mlekarstvu veliki značaj. Međutim, kod nas je dosada to pitanje bilo prilično zanemareno, premda ima veoma značajno mesto u privredi.

Potreba za formiranje jednog organa u zemlji koji bi u saradnji sa drugim resorima, institutima i naučno istraživačkim ustanovama, vodio celokupnu brigu za podizanje i unapređenje mlekarstva u zemlji proizlazi iz tri osnovna razloga: